



SINDIKAT MAŠINOVOĐA-STROJOVOĐA u FBiH

Put života 2. 71000 Sarajevo, BiH / Tel; fax: +387(0)33-218-298 / ŽAT +387(0)33-657-313 / lok: 2383
E-mail; sindikar.masinovodja@zfbh.ba ili administrator@sms-fbh.ba / [http:// www.sms-fbh.ba](http://www.sms-fbh.ba)

Saopštenje za medije

Dana 09.08.2011.god. Predsjednik uprave-Generalni direktor JP Željeznice FBiH d.o.o. Sarajevo Nedžad Osmanagić je donio Rješenje o suspenziji predsjednika Samostalnog sindikata strojovođa-mašinovođa FBiH kao i Zahtjev za pokretanje disciplinskog postupka zbog, kako se navodi, teže povrede radnih obaveza.

U obrazloženju ovog zahtjeva kao razlog se navodi da je Vernes Buljugija „ *grubo i naročito drsko vrijeđao ugled Društva i Uprave društva neovlaštenim saopštavanjem podataka i omogućavanjem dostupnim isprava iz domena poslovne tajne društva, kršeći odredbe Etičkog kodeksa, Pravilnika o poslovnoj tajni, Pravilnika o radu i zakona, stvarajući negativan imidž u tržišnom smislu u odnosu na komitente željeznica, dajući sliku o Društvu na neprimjeren način i neistinit način ...*“

U zahtjevu za pokretanje disciplinskog postupka su poimenice navedeni svi medijski istupi predsjednika sindikata, i to izjave date: Dnevnom avazu dana 06.04., 14.05., 24.07., Dnevniku FTV 07.08., Dnevniku TV1 07.08. i 08.08.ove godine, kao i internet portalima Bljesak.info, i Dnevnik.ba.

Ovim putem Sindikat strojovođa-mašinovođa FBiH se obraća gore navedenim medijskim kućama sa isključivim ciljem da potvrdi sve navode koje je predsjednik sindikata iznio u svojim javnim istupima. Iza svake njegove izjave stoje svi čestiti radnici JP Željeznice FBiH kojima je stalo da se konačno prestane sa nepoštivanjem vladavine prava i konstantnim gaženjem elementarnih prava i dostojanstva radnika Željeznica FBiH.

Vernes Buljugija nije u svojim istupima iznio ni jedan podatak niti činjenicu koja nije već bila predmet sudskih postupaka ili krivičnih prijava kojima su zatrpani sudovi u Sarajevu, Mostaru, Čapljini, Bihaću. Potvrdu tačnosti svake njegovi javno iskazane riječi daje preko 100 donesenih sudskih presuda kojima je Željeznica FBiH dužna isplatiti radnicima višemilionske novčane iznose na ime tužbenih zahtjeva koje je prouzrokovala Uprava svojim upornim kršenjem zakonskih propisa, krajnjim nepoštivanjem odredbi Zakona o radu, odredbi Kolektivnog ugovora željezničara FBiH i Općeg Kolektivnog ugovora FBiH. Potvrdu tačnosti njegovih izjava je dao i revizorski izvještaj kao i nadležno Ministarstvo prometa koje je stanje u Željeznicama okvalifikovalo na još gori način.

Ovakvim svojim postupkom Uprava JP Željeznice FBiH d.o.o. Sarajevo na krajnje bezobziran način pokušava spriječiti sindikalno djelovanje našeg sindikata, njegovu pravednu borbu u okviru svojih zakonom definisanih ovlaštenja i na neprimjeren način pokušava omogućiti da se ovako krajnje alarmantno stanje u firmi zataška, da bi na račun toga i dalje ostvarivala svoje ogromne privilegije.

Suspenzija predsjednika Sindikata strojovođa-mašinovođa FBiH je kap koja je prelila čašu i predstavlja direktan atak na pravednu borbu za elementarna radnička prava.

Sindikat strojovođa-mašinovođa FBiH će nakon ovoga, u dogovoru sa drugim sindikatima Željeznica FBiH, kao i sa nadležnim državnim institucijama, preduzeti sve neophodne korake da se ovaj potpuno nezakonit akt uprave u potpunosti poništi.

